

34. EITOPIWUOKI LAZARO

Yohana 11:1-44

Etii apa emuyei oleng' oltung'ani oji Lazaro, olalashe le Marisa o Mariamu naa olchore le Yesu. Neirriwaki inkanashera Yesu olkilikuai ejo, "Lo Kitok, ng'urai, emuei oloshi linyor." Ore pee ening' Yesu ina nejo, "Mme ene keeya ena mueyan, kake ene nkitoo e Nkai."

Nenyor apa Yesu Lazaro o inkanashera enye, kake etobiko enetii inkolong'i are eton eitu elo enkang' e Lazaro tenebo iloitung'eni lenye. Nelike ninche, "Etua Lazaro, nang'ida nanu te nkaraki intae inchere matii ine, pee itumutumu aairuko. Kake enyeito maape enetii ninye." Ore pee elotu Yesu nenyorriki etobiko Lazaro te nkurare inkolong'i ong'uan. Ore pee ebaiki enkang' nedol ajo etii iltung'ana kumok aaitigir inkanashera. Nelotu Marisa enetii Yesu nejoki, "Lo Kitok, te naa itii apa ene anaata eitu eye olalashe lai. Kake ore o taata, ayiolo ajo ore embae pooki niomonu te Nkai, aikincho iyie."

Nejoki Yesu ninye, "Kepiu olalashe lino aitoki." Nejoki Marisa, "Ayiolo ajo keitoki apiu te mpiunoto e nkiting'oto." Nejoki Yesu ninye, "Ara nanu empiunoto nara enkishui. Ore ilo laairuk nanu, ore ninye te neye, neishu; ore pooki oishu laairuk nanu nemeye intarasi. Iruko iyie kuna?" Nejoki, "Ee Olaitoriani, airuko inchere ira Kristo, Enkerai e Nkai nalotu enkop." Nelotu sii Mariamu enetii Yesu nebatata too nkejek enyena nejoki, "Lo Kitok, te naa itii apa ene anaata eitu eye olalashe lai." Ore pee edol Yesu enkurare neishir. Nejo iltung'ana, "Eng'ura eneba enyorrata nanyor ninye!"

Ore pee ebaiki Yesu enkurare nejo, "Ewuang'ie osoit te nkurare." Ore Marisa nejoki ninye, "Lo Kitok, etong'ua taata, amu inkolong'i ong'uan anaa neye." Nejoki Yesu ninye, "Tiniruk iyie nidol enkitoo e Nkai." Neaku, eiwuang'ie ninche osoit; nedumu Yesu inkonyek aing'or shumata nejo, "Papa aaisho enashe amu kitoning'o pee eiruk kulo tung'ana nchere iyie likirriwua." Ore pee eidip atejo neijia, nebuak ninye to ltoilo sapuk ajo, "Lazaro, tupuku boo!" Nepuku lido otua. Nejoki Yesu ninche, "Entalak too nkarash naanukarieki iltung'ana ninchosho ninye meshomo." Neaku keiruk iltung'ana kumok Yesu ena olong'.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata nitoduaa Enkai easisho te nkoitoi engolon? Tia oitoo eidim ena aibelekenya enkishui ino?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Eitopiuo Yesu Lazaro te nkeeya
 - Kaji eiko? – te ororei lenye (anaa eitobirua Enkai enkop apa!)
 - Kainyoo? – pee eitodol enkitoo enye.

- o Keitodol inchere keitore enkishui neitore sii enkeeya
- o Keata enkitoria te enkeeya
- **Kaji eiko teneitodolu ena atini nchere keyiolo Enkai (Yesu) pooki toki?**
 - o Etaiolou kaji etiu eton eitu etiu. Etolikio iloiteng'eni
 - o Neyiolou ajo etua Lazaro ata eton eitu elo enkang' enye.
 - o Neyiolou sii enkipirta enkeeya enye – pee eitagol enkirukoto enye naa pee edol iltung'ana enkitoo e Nkai neyiolou ajo Enkai airriua ninye.
 - o Neyiolou iltauja oo Itung'ana naa iyieunot enye.
- **Kaji eiko teneitodolu ena atini nchere keata Enkai (Yesu) empiris? (enyorrata, neata oling'ur too laing'okok, esupatisho, neuro o Itungana)**
 - o Kenyor apa Mariamu o Marisa or Lazaro. Nenyor sii iyiook pee kidol enkitoo enye
 - o Oling'ur lenye – keishira ilkiyio tenkaraki emion oo Itung'ana
 - o Oling'ur tenkalo ilaing'okok – Lazaro, inkanashera enye o ilkulikae
 - o Nenyor iltung'ana tiatu enkitanyanukoto
 - o Nejo, “Kara nanu empiunoto nara enkishui. Ore ilo laairuk nanu, ore ninye ten eye, neishu. Ore Yesu, naa olaisho enkishui, yaani, Enkai kewan.
- **Keitodolu enkatini ajo keisiligayu Enkai? (meibelekenya, neas inaaajo, neitabaya nkisiligat.)**
 - o Ana etiaka ilooiteng'eni lenye, eitu eiting' enkeeya e Lazaro te nkeeya. Etaasa enetejo.
 - o Keipanga Yesu pee etum Enkai enkisisa! Keata Yesu enkitoria.
 - o Etabaya Yesu enkipirta enye.
 - o Kidamu osiligi le Nkai to Ichamba le Eden ajo kerriu Olaitajeunoni oidim atimira enkeeya or Shetani.
 - o Keibala ajo ore Yesu naa Olaitajeunoni laisiligi Enkai ti olchamba le Eden!

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- o Eitodol Mariamu o Marisa teneipot Yesu aret olalash lenye
- o Neiruk Mariamu o Marisa ajo keidim Yesu aibooyo enkeeya. Neiruk sii Marisa inchere ore Yesu naa Kristo, Olaitajeunoni o Siligi. Kake keing'ash sii peno. Kake kenyoraa Yesu ata enkirukoto kiti!
- o Neitodol Yesu enkitoo enye pee eiruk iltung'ana ajo eirriwaa Enkai ninye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- o Amaa, ekinyamal tinidamu enaikununo enkeeya ino? Ajo etii aji nilo? Indim atisipe enilo teniye? Igira apik osiligi lino ti ai?
- o Amaa indim airukoo osiligi le Yesu kulie katitin naa keing'ash ai kata tenkaraki enchalan ino anaa Marisa or Mariamu? Keata Enkai oling'ur too iltung'ana anaa iyie?